

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**Z A K O N
O DOPUNI ZAKONA O SUDOVIMA U FEDERACIJI BOSNE I HERCEGOVINE**

Sarajevo, april 2014. godina

PRIJEDLOG ZA DONOŠENJE ZAKONA PO HITNOM POSTUPKU

Postupajući u smislu odredaba člana 26. Poslovnika o radu Vlade Federacije Bosne i Hercegovine – Prečišćeni tekst („Službene novine Federacije BiH“, br. 6/10, 37/10 i 62/10) predlažemo donošenje Zakona o dopuni Zakona o sudovima u Federaciji Bosne i Hercegovine po hitnom postupku, obzirom da su u konkretnom slučaju ispunjeni uslovi iz člana 191. stav 2. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07 i 2/08) i člana 186. stav 2. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“ br. 27/03 i 21/09).

Z A K O N
O DOPUNI ZAKONA O SUDOVIMA U FEDERACIJI BOSNE I HERCEGOVINE

Član 1.

U Zakonu o sudovima u Federaciji Bosne i Hercegovine („Službene novine Federacije BiH“, br. 38/05, 22/06, 63/10, 72/10 i 7/13) u članu 80. iza stava 2. dodaje se novi stav 3. koji glasi:

„Izuzetno, odredba stava 2. ovog člana neće se primjenjivati u slučaju propisivanja posebnih nadležnosti Vrhovnog suda ako je to predviđeno posebnim federalnim zakonom“.

Dosadašnji stav 3. postaje stav 4.

Član 2.

Ovaj zakon stupa na snagu narednog dana od dana objavljivanja u „Službenim novinama Federacije BiH“.

**OBRAZLOŽENJE
ZAKONA O DOPUNI ZAKONA O SUDOVIMA U FEDERACIJI
BOSNE I HERCEGOVINE**

I. – USTAVNO-PRAVNI OSNOV ZA DONOŠENJE ZAKONA

Ustavni osnov za donošenje navedenog zakona sadržan je u odredbi člana IV.C.3. Ustava Federacije Bosne i Hercegovine, kojom je predviđeno da pravila postupka koja su potrebna da se osigura jednakost u postupanju, kao i osnovni principi pravičnosti u postupcima pred sudovima uredit će se zakonima Federacije, a što je u skladu sa odredbom člana IV.A.20.(1) d) Ustava Federacije, Parlament Federacije nadležan za donošenje ovog zakona.

II. – RAZLOZI ZA DONOŠENJE ZAKONA

Osnovni razlog za donošenje ovog zakona jeste stvaranje normativnih preuslova za nesmetanu primjenu odredaba Prijedloga Zakona o suzbijanju korupcije i organiziranog kriminala u FBiH, odnosno usklađivanje odredaba ova dva buduća propisa. U tom smislu isti će biti upućen u parlamentarnu proceduru u paketu sa Prijedlogom Zakona o suzbijanju korupcije i organiziranog kriminala.

III. – OBRAZLOŽENJE RJEŠENJA

Članom 1. Prijedloga zakona o dopuni Zakona o sudovima u Federaciji Bosne i Hercegovine vrši se intervencija na članu 80. Zakona o sudovima u Federaciji Bosne i Hercegovine na način da se stvaraju mehanizmi za mogućnost propisivanja nadležnosti Vrhovnog suda Federacije BiH posebnim federalnim zakonom. Odredba stava 2. navedenog člana predviđa da će se u slučajevima da je Zakon o sudovima u Federaciji BiH u suprotnosti sa odredbama drugih zakona, primjenjivati Zakon o sudovima u Federaciji BiH. Propisivanjem novog stava 3. predviđa se izuzetak od primjene stava 2. a u cilju nesmetane primjene budućeg Zakona o suzbijanju korupcije i organiziranog kriminala u Federaciji Bosne i Hercegovine.

IV. – PROVEDBENI MEHANIZMI

Provođenje Zakona osigurano je kroz postojanje državnih pravosudnih organa u Federaciji BiH koji su nadležni da postupaju po Zakonu o krivičnom postupku Federacije Bosne i Hercegovine.

V. – FINANSIJSKA SREDSTVA

Za provođenje ovog zakona nije potrebno osigurati dodatna sredstva u Budžetu Federacije BiH.

ODREDBE ZAKONA KOJE SE MIJENJAJU

Član 80.

Prestanak važenja zakona o sudovima

Danom stupanja na snagu ovog Zakona prestaje važiti Zakon o Vrhovnom sudu Federacije Bosne i Hercegovine ("Službene novine Federacije BiH", br. 2/95, 4/95, 9/96, 20/01 i 44/01).

U slučaju da je ovaj Zakon u suprotnosti sa drugim zakonima u Federaciji primjenjivat će se ovaj Zakon.

Kantonalna zakonodavna tijela dužna su u roku od 90 dana od dana stupanja na snagu ovog Zakona uskladiti svoje zakone i druge propise sa odredbama ovog Zakona.